

使是文復重口口為其平遠失其一事一事可起失之于前得之于後此事尤重大大惡之也吾知其口口以示勸真人以付歸上道德之君得而行之與神無異也乃且太平上皇正氣立自來也吾之文不敢負天地不負上德君不負後生下古之人不負萬物行之立效善哉善哉願聞一人上書何故亂天二人何故亂地然此者各從其家并策相應者相感動此自然法子知之耶唯唯行子已知之矣天下之事各從其類也願問天師今應此文言為之寧能盡實核天下悉信耶然天下悉信矣願聞其意然且語真人大要說今是主者長吏亦畏民泄其事而生之六考問長得其信也民亦畏縣官得其短亦復信也縣官長吏居民亦畏行於他方上書者得其短亦信也行上書者亦畏縣長吏居民得其短也亦信也更相畏非敢有妄語者也亦非有可隱也是故使三處上書縣官與居民與行者悉旦三相應不失錄分也神哉為道如此願聞到也所集議人當於何期乎善哉子

之言悉記於太平來善之宅下何必於此然其有奇方殊文可使投於太平來善宅中因集議善焉於其下而四方共上事也為一人議中悔而止或為旁人所止上書便在方道中止意以其所匿事罪之如此書者天下已得矣帝王已長游矣善哉善哉今天師文積備多當盡何投之其文獨為上出者止於上悉為天下事出者悉出之子知之耶唯唯行去夫上德之君天自使有聖心且緣是自有善意自有善令儀此為天法不失絲髮也事亦不可勝記常苦文行去唯唯

右天告六真人使重知三道行文書訣

太平經卷之八十六

太平經卷之八十八八十九

作來善宅法第一百二十九

傳九

六方真人再拜願有所問一疑行言之今天師前所勸愚生拘校上古中古下古之要文及究竟賢明之善辭口中訣事也今四境之界外內或去帝王萬萬里或有善書其文少不足乃遠持往到京師或有奇文殊方妙術大儒穴處之士義不遠萬里往詣帝王街賣道德或有黎庶幼弱老小田家嬰兒婦女曾心各有所懷善字訣事各有一兩十數少少又不足使人遠齋持往詣京師或有四境夷狄隱人胡貊之屬其善人深知秘道者雖知中國有大明道德之君不能遠故齋其奇文善策殊方往也今天師言乃都合古今河洛神書善文之屬及賢明口中訣事以為潤極之經乃後天地開闢以來災悉可除也帝王長遊樂垂拱無憂也言一事不足備輒有餘災故當都合之今不知當以何來致此奇方殊策善字迺悉得之善哉善哉諸真人思念劇也天神已下告諸真人矣上皇之氣來祐

助道德之君口口矣行真人今乃為皇靈天具問事吾職當為天下具談何敢有懈焉諾諸真人安坐方為真人悉說之唯唯以此書付歸上皇道德之帝王見天文必思其要意勅州郡下及四境遠方縣邑鄉部宜各作一善好宅於都市四達大道之上也高三丈其中廣縱亦三丈為四方作善踈使與人面等其踈間使可容手往來善庇其戶也勿令人得妄闖入也懸書於其外而大明其文使其口口書其宅四面亦可也其文言帝王來索善人奇文殊異之方及善策辭口中訣事人胃心常所懷所能言各悉書記之投於此宅中自記姓字已且徵索之各以其道德能大小署其職也所言多少其能不可徵者且悉勅所屬縣邑長吏以職任之也其老弱婦女有善言者且勅主者賜之其有大功而不可任者且復之也四境之外其有所貢進善奇異策用之有大效者且重賞賜之也如此四境內外一旦而同計大興俱喜思為帝王盡力從上到下從內到外遠方無有餘遺策善

字奇殊方也人皆一旦轉樂為善也隱士穴處人中出遊於都市觀帝王太平來善之宅無有自藏匿者也風雨為其時節三光為其大明是天大喜之效也四夷八十一域中善人賢聖聞中國有大德之君治如此莫不樂來降服皆齋其珍奇物來前後成行吾之書萬不失一也豈不大樂哉大德之治如此諸真人寧解曉之耶唯唯然子已覺矣於其宅中文太多者主者更闢其宅戶收其中書文持入與長吏眾賢共次其中善者以類相從除其惡者去其復重因事前後齋而上付帝王帝王復使眾賢共次去其中復重及惡不正者以類相從而置一闕處復令須四方書來前後次之復以類相從復令須後書至也其四方來善宅已出中奇文殊方善策者復善閑之於其畜積多者復出次之復齋上之於四方辭旦日少畢竟也所上略同使眾賢明共集次之編以為洞極之經因以大覺賢者乃以下付歸民間百姓萬民一旦俱化為善不復知為惡之數也此所謂畢得天地人

及四夷之心大樂日至并合為一家共成一治者也六真人豈知之耶唯唯行六真人已知之矣夷狄聞之日自却去中國日以廣不戰聞伐而日彊也天地助其除惡是為天地開闢以來未常有也是故天下大喜也天地神靈共除帝王承負也災變已消去其治與神無異也天下人且大得道德奇方皆思善文正字不復為邪惡也所上且歲益善於其後三歲一小錄五歲一大錄次之此以下附歸於民間也使其各好為善不能自禁止也取其中大善之事有益於帝王正治者留之勿下之也真人知之耶唯唯然今真人天使諸弟子問是今既為天問事乃為德君作大樂之經努力勿懈也天且報子功子乃為皇天后土除病為帝王除災毒承負之厄會子明自當增算吾言不敢欺真人也慎之唯唯行去歸努力精行有疑者來唯唯真人前子前問事之時吾欲去久矣故中與子斷訣之文見子惓惓知為皇天祐陽精所以然者見真人精中國當大興平八十一域善人當降

來歸中國故吾爲子更止留悉究竟說之也所以然者見真人爲天問事不止反恐得大過於子得謫於天地故不敢弃道而去也真人知之耶唯唯唯行努力精卒之勿棄天道問一訣也唯唯願請訣事言之天師何晤正於都市四達道上爲太平作來善文奇策密方之室乎善哉真人之難問也得其大要意天積悒悒帝王使子難問耶其投辭何一工也然吾若天上觀之有可親見不空妄作此皇平之宅於四達上也天公問天下何故難平安哉五行神吏上對言今帝王乃居百重之內去其四境萬萬餘里大遠者多冤結善惡不得上通達也奇方殊文異策斷絕不得到其帝王前也民臣冤結不得自訟通也爲此積久四方蔽塞賢儒因而伏藏久懷道德悒悒而到死亡帝王不得其奇策異辭以安天下大咎在四面八方遠界閉不通今故承天心意爲太平道德之君作來善致上皇良平之氣宅於四達道上也欲樂四方悉知德君有此教令翕然俱喜各持其善物殊方

來付歸之於上無遠近悉出也無復斷絕者也善哉善哉響不及天師力問不得知之也然真若真人言也夫人天性自知之其上也不能自知之力問亦其次也子知之邪唯唯願請問一事言之何故必使其廣縱三丈高三丈乎善乎善乎之言也一者數之始也天數亦終於十地數亦終於十人數亦終於十故使三丈也欲樂合天地人使其俱悅喜也故象天地人爲之也今請問三數何故俱十乎哉然天有五行亦自有陰陽地有五行亦自有陰陽人有五行亦自有陰陽也故皆十善哉善哉今獨天地人如此邪哉然萬物悉如此邪哉然萬物悉象天地人也故天地人皆隨四時五行爲盛衰也真人知之邪善乎善乎然子可謂已知之矣願請問一事言之今何故必爲其四方作踈與面齊者然踈者欲使賢儒策之也踈者樂四方踈達不復閉絕也欲使賢者各踈記其辭投此太平來善之室中也與面齊者面者最人之善者也太陽之分象天道也樂人各順天心思爲善與

德君并力共平天下也故使與面齊面者有七正耳目口鼻可以通氣神祇往來樂大賢策之使四方八極遠境聰明悉來至也今帝王雖居百重之內與民相去萬萬里光明教令悉暢達也不失天地之心以安其身善哉善哉願請問當使何吏守此宅哉長吏直署唱名爲太平之宅樂善之吏也善乎善乎生知天已大喜矣地已大悅慎行也人已太平理矣萬物已得其所矣今真人何以知之乎愚生見天師爲太平德君制作大樂之宅以通天地人之談語今使下民臣各得奏上其辭於其君今帝王得奇策異文殊方可以長自安全者又天地得通其談語百姓下賤得達其善辭以解天地悒悒以助其君爲聰明天地與人爲凡物之長也乃得悉通達故大樂也真人說是也善哉吾無以加之也子之言事大入真道矣願請問一疑言之今天乃悒悒欲言何故返使人談哉善乎子之難問得其意然夫天道乃轉而相因更相使也故兌爲天地之口人亦然故以類相求故人爲天

地談也真人知之耶唯唯行子易開我勉力
勉力唯唯然辭小竟勿復問合道文難知反
益憤憤也唯唯行戒真人一事為已校書文
殊方也卷投一善方始善養性之術於書卷
下使眾賢誦讀此當為洞極之經竟者因各
集此方以自養誦此術以自全令各樂得久
存上賢可以為國輔中賢可為國小吏下小
人不能仕者可長養其親而久守其子孫善
哉善哉天下大樂悅也為善無雙無復惡人
也子已知之矣行去思之念之既為天問事
勿懈唯唯

右求善以致太平今天下一旦合心上皇
大樂之宅文

太平經卷之八十八

太平經卷之八十九

八卦還精念文第一百三十一

玄明內光太幽多氣與賢同位壬癸之居玄
子共身周流相抱極陰生陽名為初九一合
生物陰止陽起受施於亥懷姙於壬藩滋於
子子子孫孫陽入陰中其生無已思外洞內
壽命增倍不可卒致宜以長久少陽有氣與
肝共位甲乙寅卯青色相類萬物之精前後
雜出仁思著勇士將發念之觀此字光若
日之始出百病除愈增年三倍太陽盛氣與
心相類丙丁之家巳午養位觀之百邪除去
身日以正宜意柔明大不可強求見字而壽
光若日中之明中和之氣與脾相連四出季
鄉乃返還戊己中居辰戌丑未為根舉順之
而思其意遂以治其病精若黃龍而見此字
其病消亡增年五倍令人順孝臣愛其君子
愛其父少陰之旬與師精并靈扇出氣位屬
庚辛申酉義誅猾邪盜賊不起邪不得害人
腎盛之氣增年百倍極陰生陽其國大昌常
而思之不知死亡陰上陽起故玄武為初始

龍德生北位在東方故隨其後朱雀治病黃
氣正中君而行之壽命無窮升執其平百邪
滅亡八卦在內神成列行白虎在後誅禍滅
殃正道日到邪氣消亡思精而不止延年之
紀身而服之何憂之有下承其上名為順道
無有謫過萬病自愈念字觀形容愛若父子
令人常喜洞照無已審而用者其效立可待
長與書俱日與神遊道以自然為洞虛無一
旦自來其道仁良子為之孝臣為其忠信知
則令人愛其身不敢妄言守而不止命無窮
焉書不空出與道連思深知其意神自來焉
初端形念字反得道元精得神明因無自然
天道萬端在人可為道成其事口不為非
患人不力為正氣何從得來行而不上日吉
遠危大人為之其國太平小人為之去禍招
福形思之幽處趣具成子而守道亂何從得
生思念而不自太平心中不亂無邪傾守
之不止日自生道不妄出付有德歸其人
右升平八卦六甲追道還精念文

太平經卷之八十九